

# Канон преподобному Амвросию Оптинскому

*Память празднуем 10 (23) октября*

## **Тропарь, глас 5-й**

Яко к целебному источнику, притекаем к тебе, Амвросие отче наш, ты бо на путь спасения нас верно наставляеши, молитвами от бед и напастей охраняеши, в телесных и душевных скорбех утешаеши, паче же смирению, терпению и любви научаеши, моли Человеколюбца Христа и Заступницу усердную спастися душам нашим.

## КАНОН

### Глас 8-й

#### **Песнь 1**

**Ирмос:** Колесницегонителя фараоня погрузи чудотворяй иногда Моисейский жезл, крестообразно поразив и разделив море, Израиля же беглеца, пешеходца спасе, песнь Богу воспевающа.

**Запев:** Преподобне отче наш Амвросие, моли Бога о нас

Церковь ныне торжествует, светло празднующи твою святую память, и с радостью воспевае ти хвалебную песнь, славящи Господа, дивнаго во святых Своих.

**Преподобне отче наш Амвросие, моли Бога о нас**

Познал еси сладость жизни во Христе и не обинуяся оставил еси прелесть земных благ и суету мира, всего себе покорив Богу.

**Преподобне отче наш Амвросие, моли Бога о нас**

Кто изочтет подвиги твоя, яже понесл еси ради Царствия Небеснаго, в пении, бдении и пощении утверждая дух свой.

**Слава:** Восходил еси от силы в силу в доброделании заповедей Христовых и стяжал еси дар Духа Святаго, Егоже действием спасл еси многия души христианския.

**И ныне:** Богородице Приснодево, Марие, простри ми милостивне десницу на помощь умоляющи Сына Твоего и Бога: яко уязвен есмь люте, и на Тя точию надежду мою положих, Ты мя ущедри.

#### **Песнь 3**

**Ирмос:** Утверждай в начале Небеса разумом и землю на водах основавый, на камени мя, Христе, заповедей Твоих утверди, яко несть свят, паче Тебе, Едине Человеколюбче.

**Преподобне отче наш Амвросие, моли Бога о нас**

Послушанием совершенным отвергался еси воли своя и тем страсти существа падшаго Адама отринул еси, всего себе предав водительству Богомудрых старцев и отцев Пустыни, иже и возрасти тя в меру возраста духовнаго.

**Преподобне отче наш Амвросие, моли Бога о нас**

Целомудрия красоту стяжала есть твоя чистая душа, силою покаяния совлекшись ветхаго человека и в духовном преспеянии облекшись во Христа.

**Преподобне отче наш Амвросие, моли Бога о нас**

Богатства тленнаго мира возненавидел еси и был еси яко странник и пришелец на земли, взыскуя Града Небеснаго, темже Домовладыка введе тя в чертог славы Своея.

*Слава:* Христос Бог обогати тя даром чудес, и многия болезни страждущих исцелил еси, не остави нас, чающих от тебе благодатную помощь.

*И ныне:* Надежда и упование наше, Владычице мира, благая Помощнице, спаси и в крепости рог вознеси православных и люди наша от всяких бед и от различных обстояний свободы.

Господи, помилуй (*трижды*).

***Седален, глас 4-й***

Лик монахов ныне славословит тя, преподобне отче наш Амвросие, ублажая честную память твою, и вся обитель в радости торжествует, почитаючи твое чистое в добродетелех житие и множество чудотворений, тобою произливаемых. Темже мы вси вкупе вопием: спасай нас молитвами твоими, Амвросие, отче наш.

*Слава, и ныне:* Под Твое благоутробие притекающе, молим, Богородице Дево, не презри рыдания нашего и молитвы, но ускори избавити от бед и скорбей люди безответныя: Ты бо едина еси известнейшее христианом упование, и к Тебе прибегающе вси спасаемся.

***Песнь 4***

*Ирмос:* Ты моя крепость, Господи, Ты моя и сила, Ты мой Бог, Ты мое радование, не оставль недра Отча и нашу нищету посетив. Тем с пророком Аввакумом зову Ти: силе Твоей слава, Человеколюбче.

**Преподобне отче наш Амвросие, моли Бога о нас**

Избранный сосуд Духа Святаго был еси и токи чудес излил еси. Приими наша молитвы и исцели нас от ран греховных и страстей.

**Преподобне отче наш Амвросие, моли Бога о нас**

Познавай силу молитвы во спасение души, научи нас душеполезно молиться ко Избавителю всех милостивому Иисусу.

**Преподобне отче наш Амвросие, моли Бога о нас**

Веру истинную Православную утверди в людех твоих, чтущих тя яко ревнителя учения Христова.

*Слава:* Что воздадим ти, преблаженне отче наш, за вся, яже воздал еси нам, чадом твоим, чтущим твою честную память.

*И ныне:* Из Твоих пречистых чресл, Богородительнице, Слово Божие произыде несказанно, Егоже объемши, от зол избавити умоли зовущих: слава силе Твоей, Господи.

### **Песнь 5**

*Ирмос:* Вскую мя отринул еси от лица Твоего, Свете Незаходимый, и покрыла мя есть чуждая тьма, окаяннаго, но обрати мя, и к свету заповедей Твоих пути моя направи, молюся.

**Преподобне отче наш Амвросие, моли Бога о нас**

Светом учения Христова просвещенный, мрак заблуждения греховнаго отшел еси, настави во свете повелений Божиих и нас, омраченных страстьми.

**Преподобне отче наш Амвросие, моли Бога о нас**

Новая свеща возсия тобою, отче, на земли Российской, озаряя светом любве Божественная вся дольная. Просвети, Богоносе нас, недостойных чад твоих, светом заповедей Христа.

**Преподобне отче наш Амвросие, моли Бога о нас**

Возлюбил еси ближняго и подъял еси его бремя грехов и скорбей, да узрит свет истины и исправит стопы своя к деланию заповедей Христовых.

*Слава:* Унаследовал еси Царство Небесное, идеже празднующих глас непрестанный и безконечная сладость зрящих лица доброту Бога неизреченную.

*И ныне:* Нескверная Агница и Богоотроковице Марие, Твоими молитвами укрепившися, святии победиша бесовския силы: темже и нам, уповающим на Тя, скоро предстани в помощь, да посрамятся и падут вси являющи рабом Твоим злая.

### **Песнь 6**

*Ирмос:* Очисти мя, Спасе, многа бо беззакония моя, и из глубины зол возведи, молюся: к Тебе бо возопих, и услыши мя, Боже спасения моего.

**Преподобне отче наш Амвросие, моли Бога о нас**

Крепкое заступление буди всем, притекающим к твоей помощи в недузех и печалех, отче наш Амвросие, оптинския обители великий Старче.

### **Преподобне отче наш Амвросие, моли Бога о нас**

Избави нас от коварства лукавых духов и изведи из глубины греховныя, да очистит нас Христос Бог от беззаконий наших и спасет души наша.

### **Преподобне отче наш Амвросие, моли Бога о нас**

Како рцем твоя благодеяния людем, страждущим и уничиженным? Како воспоим ти благодарственную песнь? Приими ныне песнь хвалебную недостойных чад твоих.

*Слава:* Посети наша немощи по милости твоей, исцели язвы духовныя силою данною ти свыше благодати, да востанем от мертвеннаго сна греховнаго.

*И ныне:* Песнословяще, Чистая, из утробы Твоея воплощагося, Тя славословим, яко Божию Матерь.

Господи, помилуй (*трижды*). Слава и ныне:

### ***Кондак, глас 2-й***

Завет пастыреначальника исполнив старчества благодать наследовал еси, болезнующа сердцем о всех с верою притекающих к тебе, темже и мы, чада твоя, с любовью вопием ти: отче святыи Амвросие, моли Христа Бога спастися душам нашим.

### ***Икос***

Доброзрачное житие показал еси и своими добродетельми озарил еси всю землю русскую, привлекл еси к себе вся концы отечества нашего, окормляя неисчетную паству верных чад твоих, ихже с любовью призрел еси яко отец чадолюбивый и милостивый. Темже стекшеся в день преставления твоего во умилении зовем: радуйся, подвижниче благочестия, восприемый богатыя дары Духа Всесвятаго; радуйся, высоту смирения и терпения, имиже научаеши верных чад своих; радуйся, древо плодоносное, имже напитал еси множество алчущих жизни вечныя; радуйся, цвете благоуханный любве Божественныя, еюже утешаются скорбящии и болезнующии; радуйся, источниче приснотекущий чудес и благотворений от нихже болящии исцелевают и гибнущии спасаются; радуйся, дерзновенный ходатаю наш пред праведным Судиею; радуйся, помощниче нам преславный во всех обстояниих; радуйся, Богомудре Амвросие, великий Старче всероссийский.

### ***Песнь 7***

*Ирмос:* Божия снисхождения огонь устыдеса в Вавилоне иногда. Сего ради отроцы в печи, радованною ногою, яко во цветнице, ликующе, пояху: благословен еси, Боже отец наших.

### **Преподобне отче наш Амвросие, моли Бога о нас**

Преселился еси в горния чертоги и тамо зриши славу неизреченную превичнаго Бога, зовя: благословен еси Боже отец наших.

**Преподобне отче наш Амвросие, моли Бога о нас**

В сонме святых угодников ныне прославляеши премудраго Творца и Господа Сил воспевая: благословен еси Боже отец наших.

**Преподобне отче наш Амвросие, моли Бога о нас**

С лики Ангелов и Архангелов предстоиши пред лицом Вседержителя и тамо немолчно поеши: благословен еси Боже отец наших.

*Слава:* Вниде в радость Господа, яко добрый и верный раб Его был еси на земли, и ныне на небесех взываеши: благословен еси Боже отец наших.

*И ныне:* Виждь Владычице, души моя злосмрадныя раны, ихже самохотне подъях окаянный, и не могу приложить пластыря, но еле жив сый вопию: милостива мне Врача всех и Бога Матерними Твоими молитвами сотвори, яко да воспою Ти: благословен, Пречистая, Плод чрева Твоего.

### **Песнь 8**

*Ирмос:* Седмерицею пещь халдейский мучитель Богочестивым неистовно разжже, силою же лучшею спасены, сия видево, Творцу и Избавителю вопияше: отроцы, благословите, священницы, воспойте, людие, превозносите во вся веки.

**Преподобне отче наш Амвросие, моли Бога о нас**

Церковь ныне ликовствует, празднующи блаженную память твою, достохвальне отче, и с радостию поет: да благословит вся тварь Господа и превозносит Его во веки.

**Преподобне отче наш Амвросие, моли Бога о нас**

Собрашася ныне в обители святей монахов множество, ублажающих твою честную память и поющих с радостию: да благословит вся тварь Господа и превозносит Его во веки.

**Преподобне отче наш Амвросие, моли Бога о нас**

Пастырие и учителяе стекошася в сей град обительный, идеже в добродетелех ты процвел еси, поя: да благословит тварь вся Господа и превозносит Его во веки.

*Слава:* Стари и младии, сильнии и немощнии приидоша ныне в дом Господень прославити преподобнаго Старца и отца, вопиюще: да благословит тварь вся Господа и превозносит Его во веки.

*И ныне:* О Тебе, Пресвятая Богородице излилася вода животная, на омовение скверны всемирныя, еуже благоволи и мое сердце прохладити, и окропити росую молитв в крове крил Твоих во веки вся.

### **Песнь 9**

*Ирмос:* Ужасеся о сем Небо, и земли удивишася концы, яко Бог явился

человеком плотски, и чрево Твое бысть пространнейшее Небес. Тем Тя Богородицу, Ангелов и человек чиноначалия величают.

**Преподобне отче наш Амвросие, моли Бога о нас**

Проповедует ныне Православная Церковь подвиги твоя, яко всероссийскаго угодника Божия, и чтит твою память, восхваляючи твое ангелоподобное житие.

**Преподобне отче наш Амвросие, моли Бога о нас**

Призри с небесе, отче наш Амвросие, на верныя люди твоя, и низпосли свыше руку помощи всем, покланяющимся честному образу твоему.

**Преподобне отче наш Амвросие, моли Бога о нас**

Услыши глас моления нашего, посети милостию твоею болезни и немощи чад твоих, с верою к тебе прибегающих, досточудне отче наш.

*Слава:* Припадаем во умилении сердец наших к стопам твоим, великий Старче земли нашея, просим и молим: не забуди посещати чтущия пречестную память твою.

*И ныне:* Кое Тебе дарование принесем Богородице? Или что вещати имамы грешнии? Точию умильно вопием, молящися: спаси рабы Твоя, Богоблагодатная Отроковице, яко да Тя присно величаем.